

Mbanjnazmungz:

Bya Heu Raemx Saw Daengh Mbanj Moq

绿水青山那蒙坡 一派生机新农村

□ Lij Ginz

Aenranz dep raemx dauqdingq ingj ndaw daemz.



▲ Ranzlaeuz sieng youq ndaw faex heu raemhrwd.



▲ Vunzmbanj baijyienj funksug giuhva ciep bawxmoq.



▲ Gij gova ndaw daemz caen yinxvunz.



▲ Vunzmbanj aeu ranz swheij banh hwnj nungzgyahloz daihhek.

Youq Namzningz Si Yungzningz Gih dieg baihnanz 18 goengleix gyae de, miz aen mbanj ndeu sieng youq ndaw bya heu raemx saw, roen haeuj mbanj bingzbwd gvangqyub, vwnzva Bouxcuengh, fwenleuzloh gag miz daegsaek. Vunzmbanj gaenxhong simsoh, gyanghongh caezcingj seuqcingh, seiqhenz caemdingh hawj vunz simniemh mbouj dingz.

Gizneix couh dwg Yungzningz Gih Sinhyangh Cin Mbanjnazmungz, daengx mbanj 162 ranz gungh 805 vunz. Dangguh mbanj guhyienh cunghab Namzningz Si ndawde aen ndeu, Mbanjnazmungz yinzvwnz lizsij caeuq gingjyawj swyenz cungj gyaeundeiz daegbied. Youq gaij guh yiengh mbanj seiz, Mbanjnazmungz youq goekdaej yiengh gaeuq aenmbanj gwnzde bae dajveh baijbouh, miz cauhamoq louz daegsaek, guh ndei ngaraemx, roenbo, luengqhongh, henz roen ndaem faex va doengh gij hong neix. Daengx mbanj 170 aen ranz guh le rogciengz bae moq, doed ok le daegsaek ranzcaep Bouxcuengh caeuq yiengh “dingjranz lingq”; guh le aen gvangjancz leuzloh faen miz roqluengq leuzloh caeuq diegdangz hozdung song bouhfaenh gungh miz

1186.73m² ndeu; Huzcihcingh caeuq Huznanzluz song giz diegraemx gungh 21260m² neix caemh ginggvaq beuj boengz caeuq lawh raemx, hawj raemxhuz sawyau raen daej, lumj naednyawh sieng ndaw rungh nei. Seizneix byaij haeux Mbanjnazmungz, couh ndaej yawjraen gij ranz aen dem aen baenz caengz baenz caengz dwk baizlele moq-sagsag, baihnaj bakdou giuziq raemxlae, faex heu raemhrwd, faexcuk ngauznged bibuengq, gova baenz caz hoengghai; vunzmbanj mbangj sam haj boux humx naengh ganggijoj, mbangj dwkgiuz doxdax, mbangj diuq foux gvangjancz; youq ndaw daemzdajndaez Huznanzluz, Huzcihcingh, ndaem miz gak cungj gak yiengh doenghgo ndaw raemx maj, variengroeg, go'ngox, go'ngaeux daengj, youq ndaw raemx yienh'ok baenz benq baenz benq loeghe; gij roqluengq yawjgingj, aendiengz, giuzgungj caeuq gij ngaeuz dauqdingq ndaw raemx doxdaengh baenz gingj ndei; henz roen ndaw mbanj gek mbouj gyae geijlai couh daengj miz aen daengroen ndatndit ndeu, doengx-haemh ronghcangcang. Youq ndaw

aenmbanj gyaeundeiz lumj veh neix menhmenh youzbyaij, mbouj miz gyukndwt, caenh miz cungj dingh-caem ndeu……

Mbanjnazmungz 500 bi gaxgonq couh miz vunz senj daeuj youq, lizsij gyaeanz, gyoebbaenz le vwnzva Bouxcuengh haemq daegbied, fung-sug sibgvenq eu fwenleuzloh caeuq hawfwen boizgiu, cienzciengq bak bi, gyawjgyae mizmingz. Moix bi youq Aenciet Yungnhingz Bouxcuengh Betyaem Vwnzva Lizyouz geizgan, Mbanjnazmungz caemh doengzseiz guh “angq youz lajmbanj”, “gijgwn daegsaek cimzgwn” daengj haujlai hozdung, hawj vunzmbanj seiqhenz caeuq hekyouz ndaej yienhciengz bae camgya guh gaeb byanouq, gyap mou, mbaet mak, gwn makfeiz daengj doxdax, dingq fwenleuzloh doiq fwen, bae caep yiuzaenz saz maenz, yaeb byaekcw, vad bez daengj, hawj gij ndaejgeiq mizyinx ndaw uk dauq yienh okdaeuj, caemh ndaej naengh youq gyanghongh nungzgyahloz ndaw mbanj, cimz gwn gij dang haekfeih gaeqdoj, saejlab gag guh, byaek singisien ngamq daj ndaw suen mbaet ma haenx, hawj mwngz miz cungj cwxcaih sim'angq ndeu.



▲ Vunzmbanj cingj gisuzyenz son ndaemganq makdumh.



▲ Daj giz gyae yawj aenmbanj gyaeundeiz.

◀ Vunzmbanj boq loxlez coux hek.

► Faex heu raemx saw yiengh gyaeundeiz.

